



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“, broj: 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“, broj: 96/13 i 89/16) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“, broj: 103/08), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2018. GODINU SAVEZA KOMUNISTA JUGOSLAVIJE

Broj: 03-07-6-384/19
Sarajevo, 23.04.2020. godine

SADRŽAJ

| | |
|---|---|
| MIŠLJENJE REVIZORA | 3 |
| 1. UVOD | 4 |
| 2. PREDSTAVLJANJE POLITIČKE STRANKE | 4 |
| 3. OPIS PREGLEDA I KONTROLE FINANSIJSKOG IZVJEŠTAJA | 4 |
| Predmet pregleda i kontrole..... | 4 |
| Cilj pregleda i kontrole | 5 |
| Obim pregleda i kontrole | 5 |
| 4. PRETHODNE KONTROLE I REVIZIJE | 5 |
| 5. NALAZI I PREPORUKE | 5 |
| 5.1 NALAZI..... | 5 |
| 5.2 PREPORUKE | 6 |

MIŠLJENJE REVIZORA

Služba za reviziju finansiranja političkih stranaka je izvršila pregled godišnjeg finansijskog izvještaja Saveza komunista Jugoslavije za 2018. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom finansijskog izvještaja za 2018. godine, utvrđeno je da je Savez komunista Jugoslavije je prekršio odredbe člana 5. stav (4) i člana 12. stav (1), (4) i (5) Zakona o finansiranju političkih stranaka.

Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Saveza komunista Jugoslavije za 2018. godinu.

Pregled i kontrola finansijskih izvještaja provedeni su u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja za 2018. godinu, Savez komunista Jugoslavije se finansirao iz sljedećih izvora:

| R/B | Izvori finansiranja | Iznos (KM) | Struktura (%) |
|-----------|--|---------------|---------------|
| 1. | Članarina | 48,00 | 25,40 |
| 2. | Prilozi fizičkih lica (3-a) | 141,00 | 74,60 |
| 3. | Prilozi pravnih lica (3-b) | 0,00 | 0,00 |
| 4. | Prihodi od imovine (3-c) | 0,00 | 0,00 |
| 5. | Prihodi od dobiti preduzeća u vlasništvu političke stranke (3-d) | 0,00 | 0,00 |
| 6. | Prihodi od poklona (3-e) | 0,00 | 0,00 |
| 7. | Prihodi iz budžeta (3-f) | 0,00 | 0,00 |
| 8. | Prihodi od propagande (3-g) | 0,00 | 0,00 |
| I | Ukupni prihodi (1-8) | 189,00 | 100,00 |
| II | Ostali prihodi i drugo | 0,00 | 0,00 |
| | Izvori finansiranja (I+II) | 189,00 | 100,00 |

U godišnjem finansijskom izvještaju stranka nije iskazala rashode.

2. PREDSTAVLJANJE POLITIČKE STRANKE

Naziv političke stranke je Savez komunista Jugoslavije. Skraćeni naziv je SKJ.

Savez komunista Jugoslavije je upisan u registar kod Općinskog suda u Mostaru, Rješenjem broj: R/1-17 od 27.12.2017. godine.

Sjedište političke stranke je u Konjicu Čelebići bb.

Prema podacima iz rješanja o upisu političke stranke u registar suda, lice ovlašteno za zastupanje Saveza komunista Jugoslavije je Dževad Kadić, generalni sekretar stranke. Politička stranka je u finansijskom izvještaju kao ovlašteno lice za zastupanje stranke navela i Adisa Suljičića, predsjednika stranke.

Lice ovlašteno za finansijske izvještaje za 2018. godinu je Dževad Kadić.

Prema podacima iz godišnjeg finansijskog izvještaju za 2018. godinu Savez komunista Jugoslavije nema niže nivoe organizovanja.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Saveza komunista Jugoslavije za 2018. godinu.

Cilj pregleda i kontrole je da revizor na bazi finansijskih izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

Obim pregleda i kontrole finansijskih izvještaja Saveza komunista Jugoslavije obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskim izvještajima sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE KONTROLE I REVIZIJE

Kontrola finansijskog izvještaja Saveza komunista Jugoslavije, u kontekstu odredba Zakona o finansiranju političkih stranaka, obavlja se prvi put.

5. NALAZI I PREPORUKE

5.1 NALAZI

a) Politička stranka nije ispoštovala odredbe člana 5. stav (4) Zakona o finansiranju političkih stranaka.

Stranka nije uspostavila evidenciju o nenovčanoj donaciji koju je ostvarila korištenjem bez naknade poslovnog prostora, niti je istu prijavila u finansijskom izvještaju.

Dževad Kadić je u svom aktu, koji je Centralnoj izbornoj komisiji BiH dostavio 01.11.2019. godine naveo da je izdao prostoriju u vlastitoj kući za rad Saveza komunista Jugoslavije, bez ikakve naknade dok ovaj politički subjekt ne nađe drugi prostor.

U skladu sa odredbama iz člana 5. stav (4) Zakona o finansiranju političkih stranaka, stranaka je imala obavezu da uspostavi evidenciju o pomenutoj donaciji, te istu prijavi u godišnjem finansijskom izvještaju u iznosu tržišne cijene zakupnine.

b) Savez komunista Jugoslavije je prekršio odredbe člana 12. stav (1), (4) i (5) Zakona o finansiranju političkih stranaka.

Pregledom godišnjeg finansijskog izvještaja, finansijske dokumentacije koju je politička stranka dostavila na zahtjev Centralne izborne komisije BiH, te dokaza iz drugih izvora utvrđeno je da izvještaj nije podnesen na propisani način, evidencija o prihodima i novčanim tokovima političke stranke nije potpuna i tačna i godišnji finansijski izvještaj nije popunjen u skladu sa odredbama Pravilnika o godišnjim finansijskim izvještajima političkih stranaka – u daljem tekstu Pravilnik.

(1) Politička stranka godišnji finansijski izvještaj za 2018. godinu nije podnijela na način kako je Centralna izborna komisija BiH propisala u članu 3. stav (1) Pravilnika o godišnjim finansijskim izvještajima političkih stranaka¹.

Uvidom u službene, evidencije utvrđeno je da je Centralnoj izbornoj komisiji BiH Savez komunista Jugoslavije dostavio obrasce godišnjeg finansijskog izvještaja 17.04.2019. godine u pisanoj formi, odnosno ručno popunjene.

¹ Politička stranka je bila dužna da godišnji finansijski izvještaj za 2018. godinu podnese do 31.03.2019. godine u elektronskoj formi, putem aplikacije „FI CIK BIH”, te da Centralnoj izbornoj komisiji BiH dostavi potvrdu o podnesenom finansijskom izvještaju u elektronskoj formi i obrasce finansijskog izvještaja, odštampane iz aplikacije u PDF formatu, ovjerene potpisom ovlaštenog lica i pečatom političke stranke.

S obzirom da politička stranka nije podnijela godišnji finansijski izvještaj u elektronskoj formi, putem aplikacije „FI CIK BIH” i nije dostavila obrasce finansijskog izvještaja, odštampane iz aplikacije u PDF formatu, ovjerene potpisom ovlaštenog lica i pečatom političke stranke, Centralna izborna komisija BiH je uputila akt, broj: 03-07-6-384-2/19 od 16.08.2019. godine kojim je obavijestila stranku da dobrovoljno postupi po odredbama Zakona i finansijski izvještaj podnese na propisani način.

Ni nakon navedenog obavještenja Savez komunista Jugoslavije nije podnio finansijski izvještaj u elektronskoj formi putem aplikacije „FI CIK BIH”.

- (2) Promet transakcijskog računa, koji je stranka prijavila u finansijskom izvještaju ne odgovara novčanom prometu evidentiranom na izvodima banke. Stranka je prijavila priliv sredstva na račun u iznosu od 199,00 KM, dok su uvidom u izvode banke utvrđene uplate sredstva u iznosu od 157,00 KM.
Pogrešnim iskazivanjem prometa po računu, politička stranka je prekršila odredbe člana 11. Pravilnika.
- (3) Stranka je, suprotno odredbama člana 13. Pravilnika, u finansijskom izvještaju iskazala različite podatke o prihodima, odnosno priložima fizičkih lica. Na obrascu 3. *Izvori finansiranja* stranka je prijavila priloge fizičkih lica u iznosu od 141,00 KM, dok je u prilogu uz obrazac 3. isti prihod prijavila u iznosu od 153,00 KM. Putem transakcijskog računa stranci su uplaćene donacije u iznosu od 145,00 KM.
- (4) Stranka u poslovnim knjigama i finansijskom izvještaju nije prijavila prihod od nenovčane donacije po osnovu korištenja poslovnog prostora bez naknade, čime je prekršila odredbe člana 13. i 18. Pravilnika.
- (5) Politička stranka je, u skladu sa odredbom iz članom 4. stav (2) Pravilnika o godišnjim finansijskim izvještajima političkih stranaka, uz finansijski izvještaj bila dužna dostaviti kopiju godišnjeg obračuna, ovjerenog od nadležne institucije (Završni račun za 2018. godinu ovjeren od strane Finansijsko informatičke agencije – FIA).
Obzirom da stranka, iako je aktom, broj: 03-07-6-384-3/19 od 13.09.2019. godine, obaviještena o obavezi dostavljanja kopije završnog računa, Centralnoj izbornoj komisiji BiH isti nije dostavila, prekršila je odredbe člana 12. stav (5) Zakona o finansiranju političkih stranaka.

5.2 PREPORUKE

Preporučuje se Savezu komunista Jugoslavije da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da vodi evidenciju o priložima, bez obzira na koji način ih ostvaruje,*
- *da finansijske izvještaje Centralnoj izbornoj komisiji Bosne i Hercegovine podnosi na način utvrđen Pravilnikom o godišnjim finansijskim izvještajima političkih stranaka i*
- *da na zahtjev Centralne izborne komisije BiH dostavlja i drugu dokumentaciju koja se zatraži od političke stranke.*

KOMENTAR

Politička stranka se nije očitovala na nalaze revizije navedene u Preliminarnom izvještaju o pregledu godišnjeg finansijskog izvještaja za 2018. godinu.

Pomoćnik revizora

Šef Službe za reviziju, revizor

Mr.sc. Goran Cicović

Mr.sc. Hasida Gušić